



Sud Bosne i Hercegovine
Суд Босне и Херцеговине

Broj: S1 3 Iž 031583 19 Iž
Sarajevo: 30.01.2019. godine

IZVORNIK

Sud Bosne i Hercegovine u Sarajevu, u apelacionom upravnom vijeću sastavljenom od sudija, Mirsade Džindo, predsjednika vijeća, dr Branka Moraita i Zvezdane Antonović, članova vijeća, odlučujući o žalbi Reformske stranke, ul. Braće Jugovića TC „Stadion“, Zvornik, zastupane po Marku Mekiću, predsjedniku Stranke, izjavljenoj protiv odluke Centralne izborne komisije Bosne i Hercegovine, broj: 05-1-07-6-457/18 od 20.12.2018. godine, u pravnoj stvari izricanja novčane kazne zbog kršenja Zakona o finansiranju političkih stranaka, u nejavnoj sjednici održanoj dana 30.01.2019. godine, donio je

R J E Š E N J E

Žalba se odbija.

O b r a z l o Ź e n j e

Odlukom Centralne izborne komisije Bosne i Hercegovine, broj i datum navedeni u uvodu, žaliteljici, Reformskoj stranci iz Zvornika, izrečena je novčana kazna u iznosu od ukupno 1.000,00 KM zbog odgovornosti što nije dostavila finansijski izvještaj-Lokalni izbori 2016. godine čime je prekršila odredbu člana 12. stav 3. Zakon o finansiranju političkih stranaka i što nije podnijela godišnji finansijski izvještaj čime je prekršila član 12. stav 5. Zakona o finansiranju političkih stranaka, te joj se za ova dva prekršaja izriču dvije novčane kazne od po 500,00 KM u konačnom zbiru jedinstvena novčana kazna u iznosu od 1.000,00 KM, primjenom odredbe člana 15. stav 2. i primjenom odredbe člana 19. stav 1. tačke g), h) i i) Zakona o finansiranju političkih stranaka.

Žaliteljica je blagovremeno uložila žalbu na navedenu odluku. U žalbi navodi da žalbu ulaže zbog pogrešno i nepotpuno utvrđenog činjeničnog stanja i pogrešne primjene materijalnog prava. U žalbi, od odlučnih činjenica, navodi da je u periodu od 01.01.2016. godine do 31.12.2016. godine imala ukupan promet na transakcionom računu u iznosu od 255,00 KM i da je dostavila Finansijski izvještaj za 2016. godinu i Završni račun ovjeren od nadležne institucije. Smatra da je do prekršaja došlo usljed promjena naziva ulica i da nisu korisnici bilo kojih javnih sredstava. Smatra da je novčana kazna neprimjerena i predlaže da je Sud oslobodi plaćanja izrečene novčane kazne.

Ispitujući pobijanu odluku u okviru žalbenih navoda vijeće Apelacionog odjeljenja Suda Bosne i Hercegovine je zaključilo da žalba nije osnovana.

Kako proizilazi iz stanja u spisu predmeta, donosilac ožalbene odluke, Centralna izborna komisija Bosne i Hercegovine je, na pravilan i zakonit način, utvrdila u ožalbenoj odluci da se žaliteljica, Reformska stranka Zvornik, nije izjasnila po Preliminarnom izvještaju o pregledu godišnjeg finansijskog izvještaja za 2016. godinu, te je, na osnovu Konačnog izvještaja o pregledu godišnjeg finansijskog izvještaja za 2016. godinu pokrenula postupak protiv žaliteljice i dostavila licu ovlaštenom za predstavljanje i zastupanje političke stranke Zaključak o pokretanju postupka i poziv za davanje izjave, o čemu svjedoče dostavnice sadržane u spisu predmeta. Nadalje, CIK BiH je provela dokazni postupak uvidom u Konačni finansijski izvještaj o pregledu godišnjeg finansijskog izvještaja za 2016. Godinu i utvrdila navedene prekršaje odredaba Zakona o finansiranju političkih stranaka („Službeni glasnik BiH“ br. 95/12 i 41/16) i Pravilnika o godišnjim finansijskim izvještajima političkih stranaka („Službeni glasnik BiH“, br. 96/13, i 89/16).

U pogledu dijela žalbe koji se odnosi na visinu izrečene novčane kazne ovo vijeće konstatuje da je Centralna izborna komisija Bosne i Hercegovine, prilikom odmjeravanja visine izrečene kazne, vodila računa o ekonomskom stanju stranke i težini prekršaja te izvorima finansiranja žaliteljice, te se držala propisanog zakonskog minimuma. Iz navedenog proizilazi da je izrečena kazna pravilno odmjerena, a žalba u tom dijelu neosnovana.

S obzirom na navedeno, po ocjeni ovog vijeća, pobijana odluka Centralne izborne komisije Bosne i Hercegovine je pravilna i zakonita a žalba neosnovana pa je istu, primjenom odredbe člana 81. stav 1. Zakona o upravnim sporovima Bosne i Hercegovine („Službeni glasnik BiH“, broj 19/02 do 74/10) valjalo odbiti.

**PREDSJEDNIK VIJEĆA
S U D I J A**

Mirsada Džindo